

Di Sekant Leta weh di Apasl Paul Rait tu di Chorch dah di CORINTHIANS

Weh dis buk deh taak bout

Dis leta wehn rait wen di Apasl Paul wende gat wan haad taim wid di chorch dah Corinth. Som a di memba wende kom gens Paul haad-haad, bot ihn wehn shuo dem ho moch ihn wehn waahn mek'op wid dem. Ahn ihn wehn uova hany seh iivn duo ihn wehn hany diil haad wid dem, aftawod dehn wehn kom roun ahn ton fahn dehn sin ahn mek'op wid Paul.

Iina di fos paat a dis leta, Paul wehn eksplien tu dem wai ihn wehn hany diil so haad wid dem wen dehn wehn kom gens im; ahn ihn tel dehn how ihn wehn hany fi mek dehn get uova dat. Afta dat ihn inkorij dem fi tek op wan kalekshan fi help demde biliiva dah Judea lan.

Iina di laas chapta deh, Paul wehn hany rimain som a di pipl dem weh wende paas demself az chruu apasl. Bot dah him, Paul, dah wehn di chruu apasl, bikaaz dehn wende akyuuz Paul seh ihn dah wehn wan faals apasl!

How dis leta set op

Introdokshan *1.1-11*

Paul ahn di chorch dah Corinth *1.12-7.16*

Di kalekshan fi di biliiva dem dah Judea lan *8.1-9.15*

Paul difen ihn atarity az wan apasl *10.1-13.10*

Paul laas wod dem iina dis leta *13.11-13*

1 ¹Dis leta dah fahn mii, Paul, weh dah wan apasl a Christ Jesus, bikaaz dat dah weh God waahn Ah fi bii. Ah deh rait dis leta lang wid fi wi breda Timothy.

Wi deh rait tu di chorch dah Corinth sity, ahn tu aala God pipl dem aal uova Achaia lan.

²Wi deh prie seh God, fi wi Faada, ahn di Laad Jesus Christ gi aala unu plenty gries ahn piis iina unu haat!

Di Apasl Paul gi ihn tanks tu God

³Wi priez God, weh aal morsy kom fram. Him dah di Faada a wi Laad Jesus Christ, ahn him dah di God weh gi wi aal di komfort weh wi niid! ⁴Ihn komfort wi iina aala wi trobl dem, so dat wi kyan komfort ada pipl weh deh go chruu fi dem uon trobl. Ahn wi komfort dem wid di siem komfort weh God gi wi. ⁵So, jos laik how wi sofa plenty sieka wii dah fi Christ, iina di siem wie him gi wi plenty komfort tu. ⁶So, if wi deh sofa, dah fi unu uon gud ahn fi mek unu get siev. Bikaaz, wen God komfort wi, dat dah fi mek wii kyan komfort unu ahn inkorij unu. Den, unu gwain kyan gat di pieshens fi go chruu di siem kain a sofarin weh wii deh go chruu. ⁷Wi gat evry kanfidens iina unu seh, jos how unu shier iina wi sofarin, unu gwain shier iina God komfort tu.

⁸Unu weh dah mi fren dem, Ah waahn unu fi memba di trobl dem weh wi wehn gaan chruu, wen wi wende iina Asia distrik. Di sofarin wehn so teribl dat wi wehn tink wi neva wehn gwain get out laiv! ⁹Di sityuwieshan wehn so bad dat wi wehn tink seh wi wehn gwain ded fi chruut. Bot dis mek wi stap chros iina wii wiself ahn staat chros ongl iina God, di Wan weh kyan riez'op pipl bak fahn di ded! ¹⁰God wehn siev wi fahn di teribl dienja a det, ahn wi gat wi ongl huop iina him, so wi nuo fi shuor seh him gwain kiip aan deh siev wi, ¹¹sieka weh unu prie fi wi. Ahn wail unu deh prie, plenty pipl gwain tank God, bikaaz so moch a dehn praya dem fi bles wi ahn mek wi stie sief, get ansa!

Paul chienj ihn plan dem

¹²Wan ting deh, weh wi proud bout: wi kanshans klier-klier seh wi wehn aalwiez diil wid unu iina wan aanes, ahn sinsier, ahn gadly wie wen wi wende wid unu. Wi wehn aalwiez dipen pahn God gries, ahn no pahn wi uon hyuuman wizdom. Ahn dat dah how wi ak wid evrybody, speshaly unu. ¹³⁻¹⁴Wi no deh rait notn ataal tu unu weh unu kyaahn riid ahn andastan. Ah huop seh wan a demya die unu gwain andastan wi iina evryting, iivn duo unu no andastan wi so gud rait now; so dat pahn Dat Die wen di Laad Jesus kom bak, unu gwain kyan bii az proud a wi, laik how wii proud a unu!

¹⁵Ah wehn so shuor seh unu proud a wi dat Ah wehn plan fi go luk fi unu fos; den unu gwain get bles fahn mi vizit two taim; ¹⁶bikaaz Ah wehn waahn go si unu wen Ah wehn gwain Macedonia, ahn pahn mi wie bak fahn deh. Den, unu kuda mek Ah go pahn mi wie tu Judea aftawod.

¹⁷Unu mosy deh wanda if Ai dah laik dehn kain a pipl iina dis worl weh kyaahn mek'op dehn main bout notn, weh wan taim dehn seh “Yees sah, wi gwain du'ih!” ahn di neks minit dehn seh, “No man, wi kyaahn du'ih!”

¹⁸Az shuor az God neva tel lai, wi wod tu unu dah wehn aalwiez, “Yees, wi gwain du'ih!” ahn neva, “Nuo man, wi kyaahn du'ih.” ¹⁹⁻²⁰Bikaaz Jesus Christ, God Son, weh mii ahn Silas ahn Timothy wehn tel unu bout, dah no sombody weh seh, “Yees!” wan minit, ahn “Nuo!” di neks! Jesus dah aalwiez di “Yees!” a God. Ahn him aalwiez grii wid God, bikaaz chruu Jesus evry wan a God pramis dem kom chruu. Dat dah weh mek wi seh, “Amen, dat dah so!” iina Jesus Christ niem eny taim wi deh gi God gluory. ²¹Dah God dah di Wan weh mek wi stan op strang fi Christ. Dah him weh pik wi out ahn gi wi di powa fi du fi him work. ²²Him put fi him stamp pahn wi aredy fi shuo seh wi dah fi him uon pipl dem. Ahn ihn put ihn Spirit iina fi wi haat fi mek wi nuo seh wi gwain get aal weh ihn gat fi wi.

²³Now, Ah kaal pahn God az wiknis seh Ah deh tel di chruut! Di riizn Ah neva gaan bak dah Corinth dah bikaaz Ah neva waahn hot unu fiilinz no muo. ²⁴Now, wi no deh trai fi tel unu weh unu fi biliiv, bikaaz unu fiet iina Jesus strang. Insida dat, wi deh work tugada wid unu fi mek unu rijais!

2 ¹So Ah mek'op mi main no fi mek unu fiil so sad pahn mi neks vazit; ²bikaaz, if Ah mek unu fiil sad, den dah huu els gwain mek Ah get glad eksep unu unusef weh Ah jos wehn mek fiil sad? ³Dat dah wai Ah wehn rait tu unu iina dah wie, so wen Ah go si unu, di siem wan dem weh fi mek mi hany no gwain mek Ah fiil sad. Bikaaz Ah nuo fi chruut seh, wen aala unu hany, ih mek mi hany tu. ⁴Lisn, ih wehn hot mi bad fi rait dat leta tu unu; ih wehn brok mi haat ahn ih ongl mek Ah krai. So, Ah neva rait tu unu fi mek unu fiil sad, bot fi mek unu nuo ho moch Ah lov unu!

Fargiv di man weh wehn kaaz aal di trobl

⁵⁻⁶Now, Ah no waahn ekzajeriet, bot iina som wiez dah man weh kaaz aal di trobl, hot aala unu muo an how ihn wehn hot mii. Ahn muos a unu don kandem di man fi weh ihn wehn du, ahn dat dah nof ponishment far im. ⁷Now den, unu shuda fargiv im ahn inkorij im, so dat ihn no get so sad ihn no iivn waahn go aan. ⁸So, Ah deh beg unu: pliiz mek shuor seh ihn nuo unu lov ahn fargiv im.

⁹Bredrin, di riizn wai Ah wehn rait datde leta tu unu dah fi tes unu, fi si if unu redy fi obie evryting weh Ah wehn tel unu fi du. ¹⁰Ai fargiv enybady weh unu fargiv. Ahn wen Ai fargiv dem —if enyting deh fi fargiv— Ah du'ih sieka unu, wid Christ az mi wiknis. ¹¹Ahn Ah du dat so Satan kyaahn out-smaat wi iina notn; bikaaz wi nuo aal weh deh iina fi him main gens wi.

Paul get anchos iina Troas

¹²Wen Ah get dah Troas sity fi priich di Gud Nyuuz bout Christ, Ah si seh di Laad wehn don mek wan wie fi mek Ah work deh. ¹³Bot mi main neva deh iina piis, bikaaz Ah neva fain mi breda Titus deh. So, Ah seh gudbai tu di pipl dem deh ahn gaan aan tu Macedonia.

Viktry chruu Jesus

¹⁴Bredrin, Ah gi tanks tu God weh aalwiez liid wi iina Christ viktry maach! Dah him weh deh yuuz wi fi spred di Gud Nyuuz evrywie, weh di pipl dem kyan nuu Christ —ahn fi nuu him dah laik di smel a wan swiit porfyuum. ¹⁵Bikaaz wi dah jos laik di smel a insens, weh Christ deh aafa op tu God, ahn dis smel deh spred mongs demya pipl weh deh get siev, ahn mongs dehn pipl weh deh pahn di ruod tu distrokshan tu. ¹⁶Fi di pipl dem weh deh pahn dehn wie tu distrokshan, wi dah wan bad sent weh liid tu det. Bot wi dah wan swiit smel tu di pipl dem weh deh get siev! Ahn dat dah wan blesin weh wi get, iivn duo wi neva du notn fi dizorv ih. ¹⁷Unu si, wi dah no laik plenty pipl weh waahn get rich aafa priich God mesj. Bot wi fi priich God Wod wid di atarity weh Christ gi wi, ahn wid wan klin haat fronta God, bikaaz dah him sen wi fi du ihn work.

God Nyuu Agriiment sorvant dem

3 ¹Ih maita soun laik wi deh staat priez wiself agen, bot dat dah no so. Unu tink seh wi dah laik demde pipl weh hafy bring rekomendieshan leta tu unu, or wi fi aks unu fi eny? ²Nuu sah, bikaaz unu unself dah laik fi wi rekomendieshan leta! Fi unu laif dah laik wan leta weh rait dong pahn wi haat, ahn evrybady kyan nuu ahn si di gud work weh wi du mongs unu. ³Evrybady kyan si seh Christ rait dis leta ihself ahn ihn sen ih wid wi. Bot dis leta neva wehn rait wid ink, bot wid God Livin Spirit! Ih neva chip-out iina rak niida, bot pahn di biliiva dehn haat.

⁴Wi kyan seh aala demya tingz, bikaaz wi nuu fi shuur seh wi kyan chros iina God chruu Christ. ⁵Dah no wii tink seh wi kyan du enyting bai wi unself, bikaaz dah ongl God weh gi wi di powa fi du aal weh wi du. ⁶Dah God aluon mek wi fit fi bii fi him sorvant dem fi di Nyuu Agriiment weh ihn wehn mek wid ihn pipl dem. Dis Nyuu Agriiment dah fahn di Holy Spirit. Ih dah no fahn non laa weh don get rait dong, bikaaz dah Laa deh bring det, bot di Spirit gi laif!

⁷Now, wi nuu seh di Laa weh wehn chip-out iina rak wehn kandem wi tu det. Ahn, wen God gi Moses dah Laa, Moses fies wende shain so moch wid God gluory dat di pipl dehn kudn iivn luk pahn ih tu lang, iivn duo dah braitnis wende fied-weh. ⁸So den, if dah Laa weh bring det kom wid

so moch gluory, den weh wi fi tink bout di Nyuu Agriiment weh di Spirit bring? ⁹If di Uol Agriiment weh bring det wehn gat so moch gluory, den di Nyuu Agriiment weh mek wi get rait wid God gat iivn plenty muo, no chruut? ¹⁰So, di fos gluory weh di Uol Agriiment wehn gat, dah no notn tu di gluory weh di nyuu wan gat. ¹¹Ahn if di Uol Agriiment weh get put wan-said, wehn gat so moch gluory; den di nyuu wan, weh gwain laas fareva, gat plenty muo! Ahn if, di ting weh neva wehn fi laas lang, gat gluory, den dah wan weh gwain laas fareva, don ful'op wid plenty muo!

¹²Now den, sieka weh wi gat aala dat fi luk ahed tu, wi no hafy fried fi taak out klier bout God ataal. ¹³Wi dah no laik Moses, weh wehn kova ihn fies so dat di pipl fahn Israel kudn si seh di gluory pahn ihn fies wende fied-weh ahn den disapier. ¹⁴Bot jos laik how Moses fies wehn kova op, siem wie so di pipl fahn Israel dehn main wehn get kova uova wid wan viel, so dehn no andastan wen dehn riid di buk dem a di Uol Agriiment! Dah ongl wen dehn chros iina Christ, dah viel kyan get tek weh fahn aafa dehn main. ¹⁵Iivn op tu tudeh die, wen dehn riid di Laa weh God gi Moses, dehn stil yet no andastan ih. ¹⁶Bot, wen somebody ton tu di Laad, God mek di viel kom aafa ihn main laik di Skriptyo seh, “Wen ihn ton tu di Laad, Moses viel get tek weh.” ¹⁷Now “di Laad” iina disya Skriptyo dah di Spirit, ahn enywie weh paat di Spirit a di Laad deh, pipl aalwiez get frii. ¹⁸So, now dat God don muuv di viel fahn aafa fi wi fies dem, di gluory a di Laad deh shain out fahn wi tu. Ahn dah siem gluory weh kom fahn di Laad —weh dah di Spirit— gwain deh chienj wi ahn mek wi bii muo ahn muo laik him, ahn dat gluory gwain get plenty muo tu.

Wii dah laik mod pat, bot gat spiritwal trezha iina wi

4 ¹So den, bredrin, bikaaz God iina ihn morsy gi wi dis speshal work fi du, wi no gwain gi'op nontaim. ²Wi no gat notn fi du wid dehn siikrit ahn shiemful tingz weh pipl du. Ahn wi no deh trai fuul nonbady op, nar twis'op God mesij niida. God dah wi wiknis seh wi deh tel di chruut, so dat di pipl dem kyan nuo iina dehn haat seh wi no deh tel non lai ataal. ³So den, if dehn gat som pipl weh no andastan dis mesij weh wi deh priich, ih wuda bii demde pipl weh deh pahn dehn wie tu distrokshan. ⁴Demde pipl no biliiv weh wi deh seh, bikaaz Satan —weh dah di god a disya worl— don blain dehn two ai dem, so dehn kyaahn si di lait a di Gud Nyuuz bout di gluory a Christ, weh shuo wi egzakly weh God laik. ⁵Unu si, wi no go roun deh priich bout fi wiself; wi deh priich bout Jesus Christ az Laad a wi laif. Aal wi seh bout wiself dah: wi dah fi unu sorvant fi Jesus siek. ⁶Bikaaz, God dah di Wan weh seh, “Mek lait shain fahn outa di daaknis!” Ahn dah him weh mek fi him lait shain iina wi haat. Ahn dah lait weh deh shain fahn Christ fies, mek wi nuo God gluory ihself!

⁷Stil yet, iivn duo wi gat disya trezha iinsaida wi wiik bady —weh dah jos laik kaman mod pat— wi nuu seh dah uova griet powa kom fahn God ahn no fahn wii. ⁸Plenty taim wi gat trobl pahn evry said, bot dat kyaahn pen wi iin, so dat wi no gat non wie out. Ahn iivn wen wi no nuu weh fi du wen tingz get riily tof, wi neva gi'op. ⁹Dehn gi wi uova haad taim, bot God aalwiesz deh wid wi. Dehn nak wi dong, bot wi aalwiesz get'op ahn go agen! ¹⁰Yees, wi aalwiesz deh iina dienja a det sieka weh wi sorv Jesus. Ahn wi bady shier iina fi him det, so dat fi him laif kyan shuo iina wi! ¹¹Bikaaz, wail wi deh liv, wi aalwiesz deh get ekspuoz tu det, so di pipl dem kyan si Jesus laif iina wi. ¹²Dis miin seh wi aalwiesz deh fies det, so dat unu kyan get laif weh neva gwain en nontaim.

¹³Dah laik weh dehn wehn seh iina di Skriptyo weh ih seh, “Ah wehn biliiv, so Ah taak bout'ih.” Wel, wi gat dah siem kain a fiet, so wi deh taak bout fi wi ekspiriens tu. ¹⁴Wi nuu seh di siem God weh riez'op bak wi Laad Jesus fahn di ded, gwain riez wii op tu, siem laik Jesus. Ahn den, God gwain ker wi ahn unu dah di siem plies weh him deh. ¹⁵Yees, aala dis dah fi unu siek. Ahn, az muo ahn muo pipl kom fi chros iina Christ —sieka God gries— plenty tanks gwain deh go'op tu di Laad, ahn him gwain get muo ahn muo gluory!

Set unu haat pahn demde tingz weh wi no si

¹⁶Ahn dat, bredrin, dah wai wi neva gwain gi'op. Iivn duo wi bady deh wies weh, stil yet di spirit iina wi deh get muo stranga evry die. ¹⁷Ahn wi nuu seh di likl bit a trobl weh wi deh go chruu fi disya shaat taim dah no notn ataal, wen wi kompier ih tu di huol paila gluory weh wi gwain get, weh gwain laas fareva! ¹⁸Unu si, wi set wi haat pahn demde tingz weh wi kyaahn si, no pahn demde tingz weh wi kyan si. Demde tingz weh wi kyan si, no laas lang; bot demde tingz weh wi kyaahn si, gwain laas fareva ahn eva!

Wi nyuu bady gwain deh op iina hevn

5 ¹Bredrin, wi nuu seh dis bady, weh wi liv iina now pahn dis ort, dah laik wan tent. Ahn, if ih get distrai, wi nuu tu seh God ihnsel gwain mek wan nyuu wan fi wi —wan weh deh op iina hevn, ahn weh no mek wid non hyuuman han niida! ²Dah chruu dat, wail wi deh liv iina dis bady wi deh grun, bikaaz wi waahn put aan fi wi nyuu bady op iina hevn so moch. ³Ahn wen wi put aan wi nyuu bady, wi no jos gwain deh bout deh bitout notn fi kova wi op. Wii gwain gat wan chruu-chruu bady. ⁴Demya bady weh wi gat now dah laik wan hevvy bordn weh deh mek wi muon ahn grun —dah no bikaaz wi waahn ded so moch, bot wi waahn God put aan di kain a bady pahn wi weh gwain liv fareva! ⁵God dah di Wan weh don get wi redy fi disya chienj, ahn dah him weh gi wi fi

him Holy Spirit so dat wi kyan nuu fi shuur seh aal weh ihn wehn pramis gwain hapm fi chruut!

⁶So den, wi aalwiesz gat plenty kanfidens iina di huop weh wi gat, bikaaz az lang az wi deh liv iina demya bady yah, wi no deh huom wid di Laad yet! ⁷Dis dah weh Ah miin fi seh: wi deh liv bai weh wi biliiv, no jos bai weh wi kyan si; ⁸so wi no fried nontaim. Wi iivn wilin fi ded, bikaaz den wi gwain go huom wid di Laad Jesus! ⁹So, weda wi deh faar fahn him iina dis bady, or bitout dis bady op deh wid him, wi aalwiesz gwain du wi bes fi pliiz im. ¹⁰Bikaaz aala wi gwain hafy stan fronta Christ fi mek im joj wi. Ahn den, iich wan a wi gwain get weh wi dizorv fi evryting weh wi wehn du iina dis laif, weda gud or bad.

Chruu Christ evryting get rait bitwiin wi ahn God

¹¹So den, bredrin, sieka weh wi nuu weh ih miin fi fier di Laad, wi trai uova haad fi kanvins di pipl dem fi ton tu di Laad. God nuu wi haat ahn ihn nuu how wi stan —ahn Ah huop seh iina unu haat unu nuu how wi deh stan tu. ¹²Unu no fi mis-andastan weh Ah deh seh: wi no deh trai agen fi tel unu seh wi so gud. Bot wi deh trai fi gi unu wan gud riizn fi bii proud a wi, so dat unu kyan ansa demde pipl mongs unu weh buos bout weh som pipl luk laik pahn di outsaid, insida how dehn stan iina dehn haat! ¹³If, weh wi deh seh soun kain a kriezy, den dat dah bitwiin wii ahn God. Bot, if wi deh taak wid sens, dah fi unu uon benefit. ¹⁴Dah sieka di lov a Christ mek wi du weh wi du; ahn wi biliiv seh, sins wan man ded fi evrybody, dat miin seh aala wi don ded tu di uol laif weh wi yuuztu liv. ¹⁵Di Laad Jesus wehn ded fi evrybody, so dat aala demde pipl weh get fi him nyuu laif, no gwain liv fi pliiz dehnself no muo. Insida dat, demde pipl gwain liv fi pliiz Christ, weh wehn ded fi dem ahn den riez'op bak fahn di ded!

¹⁶So now, bredrin, wi no joj nonbady laik how pipl weh dah no biliiva, wuda joj dem. Ahn iivn duo wi yuuztu joj Christ laik dat, wi no du dat agen. ¹⁷Lisn: wen enybady dah wan wid Jesus Christ, dehn ton wan nyuu porsn; ahn dehn dah no di siem agen, bikaaz dehn uol wie a livin gaan, ahn evryting get nyuu-nyuu! ¹⁸Dah God du aala dis. Ihn wehn ton wi fahn bii ihn enemy tu ihn fren dem, chruu weh Jesus Christ du pahn di kraas. Ahn now ihn gi wi dis speshal work fi help mek plenty ada pipl get rait wid God tu. ¹⁹Dat miin seh God wende work chruu Christ fi bring bak aal di pipl fahn di worl tu himself; di Laad no huol dehn sin gens dem no muo. Ahn ihn lef wi fi tel di pipl dem di mesij bout how dehn kyan get bak rait wid God.

²⁰So den, bredrin, wi dah Christ representativ dem weh ihn wehn sen fi taak tu unu. Wii deh beg unu jos laik dah Christ himself deh beg unu seh, “Mek God ton unu fahn ihn enemy tu ihn fren dem!” ²¹Memba: dah

sieka aala wi sin, God put dah sin pahñ Christ —iivn duo him neva sin— so dat wii kuda bii wan wid Christ, ahñ evryting get rait bitwiin wii ahñ God.

6 ¹So bredrin, wii weh deh work tugada wid God, deh beg unu fi mek gud yuus ah di gries weh God wehn gi unu. ²Bikaaz God seh: “Wen di rait taim wehn kom, Ah wehn lisen tu yu, ahñ wen di die fi siev yu wehn kom, Ah wehn help yu.”

Lisen tu mii, pipl! Now dah di rait taim fi get God gries. Tudeh dah di die fi mek him siev unu!

³Az fi wii, wi deh trai liv iina wan wie so dat nonbady kyaahn fain non faalt wid di work weh wi deh du. Wi no waahn du notn fi kiip bak nonbady fahn fain di Laad. ⁴Insida dat, iina evryting weh wi du, wi shuo seh wi deh sorv God fi chruut, bikaaz wen wi go chruu wi trobl dem wid aala di sofarin ahñ haad taim, ihñ mek wi gat plenty pieshens. ⁵Som taim dehn biit wi, ahñ dehn chruo wi iina jiel. Wi get hot iina raiyat, ahñ wi work til wi waahn jrap dong. Som taim wi iivn hafy go bitout sliip ahñ fuud. ⁶Bot stil yet, wi pruuw seh wi deh du God work bai di kliin laif weh wi liv, ahñ bai wi andastandin, ahñ pieshens, ahñ wi kainis, ahñ wi chruu-lov weh di Holy Spirit powa gi wi. ⁷Wi wehn fietful fi priich di chruut, ahñ God powa wende work iina wi. Wen wi liv rait wid God, dat dah laik wi wepan weh wi wehn yuuz fi atak ahñ fi difen wiself. ⁸Weda or nat di pipl dem ana wi, or bring wi dong; weda dehn taak bad bout wi, or priez wi; stil yet wi deh sorv di Laad. Wi aanes, bot dehn stil seh wi no tel di chruut. ⁹Evrybady nuu wi, bot dehn go aan laik dehn no nuu wi. Wi fies det evry die, bot si wi yah —wi stil yet deh liv! Wi get som bad biitn, bot dehn no kil wi yet. ¹⁰Wi haat hevvy, bot wi stil kyan rijais. Wi no gat plenty tingz, bot plenty pipl get rich blesin chruu weh wi priich. Wi no uon notn, bot stil evryting dah fi wi.

¹¹Lisen gud, unu fren iina Corinth sity weh wi lov so moch: wi deh tel di chruut wen wi seh: Wi wehn uopm op wi haat tu unu. ¹²Wii dah no di wan dem weh shet op wi haat fahn unu; dah unu uonself weh huol bak unu lov fahn wi! ¹³Ah deh taak tu unu siem laik if unu dah wehn mi uon pikniny dem. Uopm op unu haat tu wi, jos laik how wi wehn uopm wi haat tu unu!

Wii dah God Templ weh liv!

¹⁴Luk out, bredrin, unu no fi jain'op wid nonbady weh no chros iina di Laad Jesus! Ansa mii: Dah how gudnis ahñ wikidnis gwain bii paadna? Ahñ how lait ahñ daaknis gwain kyan get lang? ¹⁵How Christ ahñ Satan kuda eva grii? Dah weh egzakly sombady weh chros iina Christ, ahñ

sombady weh no biliiv, gat fi du wid wan anada? ¹⁶Eny aidal bizniz fi deh, iina God Temp! No sah, bikaaz dah wii dah God Temp! weh liv! Dah laik weh di Laad ihnsel wehn seh:

“Ai gwain mek mi huom wid mai pipl dem;
ahn Ah gwain waak mongs dem.
Ah gwain bii dehn God,
ahn dehn gwain bii mai pipl.”

¹⁷Ahn di Laad seh tu:

“So den, unu fi kom out fahn mongs demde pipl weh no biliiv.
No gat notn fi du wid dem!
Unu no fi gat notn fi du wid notn weh doty;
den, Ai gwain welkom unu.”

¹⁸“Ai gwain bii fi unu Faada,
ahn unu gwain bii mi son ahn mi daata dem!”
Dat dah weh di Laad Aalmaity seh.

7 ¹Mi dier fren dem, sins God mek aala demya pramis tu wi, mek wi kiip faar fahn enyting weh gwain mek wi bady ahn wi spirit doty wid sin. Mek wi du wi bes fi liv wan huoly laif iina evrywie so dat wi kyan shuo rispek tu him!

How Paul fos leta tu di chorch dah Corinth afek di biliiva dem

²Bredrin, unu fi uopm op unu haat tu wi, bikaaz wi neva du nonbady notn bad; wi neva liid nonbady astrie; ahn wi neva tek chaans wid nonbady niida. ³Ah no deh seh dis fi kandem unu, bikaaz laik weh Ah wehn seh, wi lov unu so moch dat wi gwain aalwiez deh tageda wid unu, weda wi deh liv or weda wi ded. ⁴Ah gat plenty kanfidens seh Ah kyan taak frii tu unu bout how proud Ah fiil bout unu, how unu inkorij mi plenty, ahn how unu ongl mek mi hapy —iivn duo Ah gaan chruu so moch trobl.

⁵Ah shuur seh unu memba seh iivn wen mii ahn mi fren dem wehn kom dah Macedonia, wi bady neva gat non chaans fi res. Troblz wende kom pahn wi fahn aal kaana; so moch so plenty pipl wende kwaaril wid wi pahn di outsaid, ahn iina fi wi haat wi wehn fried riily bad. ⁶Bot God —weh dah di Wan weh inkorij ihn pipl weh gat hevvy haat— wehn inkorij wi wen Titus kom bak. ⁷Ahn wi neva get inkorij jos bikaaz ihn kom, bot sieka weh ihn tel wi how unu wehn inkorij him tu! Ahn wi wehn ongl get hapy wen ihn tel wi ho moch unu wende luk ahed fi si mi, ahn how unu wehn sary bout aal weh wehn hapm ahn unu kudn wiet fi sopuot mi.

⁸Ahn, iivn if dah leta weh Ah wehn rait tu unu wehn hot unu fiilinz, Ah no sary Ah wehn rait'ih. Fahn fos, Ah wehn fiil bad bout'ih, bikaaz Ah nuo ih wehn gwain mek unu fiil sad fi wan likl wail. ⁹Bot Ah hapy now —no bikaaz Ai wehn mek unu fiil sary fi weh unu wehn du— bot

bikaaz unu uonselv wehn get sary fi weh unu du, ahn dat mek unu ripent ahn chienj unu wiez! Bredrin, dat dah di kain a sary weh God waahn ihn pipl dehn gat. So den, wi neva du non damij tu unu iina non wie, no chruut? ¹⁰Wen God mek sombody sary, ih mek dehn haat chienj, ahn den dehn ton fahn dehn sin dem ahn get siev. Ahn nonbody no fi fiil sary bout dat! Bot, wen di pipl iina disya worl mek wan porsn fiil uova sad, ih ongl gwain liid tu det.

¹¹Luk pipl, how God yuuz di sadnis weh unu wehn fiil sieka aal weh wehn hapm! Dah no dis kain a sadnis mek unu iiga fi pruv seh unu riily waahn unu haat kliin? Dat dah weh hapm; unu sadnis mek unu beks ahn worid ahn fried. Ih mek unu waahn si di wan weh wehn du dah rang get ponish, ahn ih mek unu kier ahn waahn du evryting fi set tingz striet — weh unu don du!

¹²So den, bredrin, dat dah di riizn wai Ah wehn rait tu unu iina di fos plies. Dah neva fi paint out huu wehn du rang, nar huu wehn get rang du tu dem. Ah wehn rait tu unu so Ah kuda mek'ih klier-klier tu unu —iina God sait— ho moch unu kier fi wi. ¹³Ahn dat dah weh wehn inkorij wi so moch.

Ahn pan tapa dat, wi wehn uova glad fi si how hapy Titus wehn hapy. Unu don mek im get piis iina ihn haat! ¹⁴Lang taim abak Ah wehn tel Titus how Ah wehn so proud a unu ahn unu neva disapaint mi. Wi wehn aalwiez tel unu di chruut, ahn weh Ah wende buos bout unu tu Titus, dah wehn di chruut. ¹⁵Now, Titus get fi lov unu iivn muo an eva, wen ihn memba how unu wehn redy fi du weh ihn tel unu. So den, Titus lov unu plenty, wen ihn memba how aala unu wehn redy fi du weh ihn wehn tel unu, ahn how unu wehn triit im wid so moch rispek. ¹⁶So, bredrin, Ah deh rijais bikaaz Ah nuo seh Ah kyan dipen pahn unu.

How di biliiva dehn shuda help wan anada

8 ¹Now, bredrin, wi waahn unu fi nuo bout God gries weh ihn wehn gi tu di chorch dem dah Macedonia. ²Dehn wende go chruu plenty trobl ahn haad taim, bot stil yet dehn wehn wilin fi gi wan aafrin iivn duo dehn wehn so puor dehnselv —ahn now di jai weh dehn wehn gat wende ron uova plenty! ³Ai deh yah fi tel unu seh, alduo nonbody neva tel dem fi du'ih, dehn gi wan big aafrin, no ongl weh dehn kuda wehn afuod, bot iivn muo an dat! ⁴Dehn wehn beg wi wid aala dehn haat fi mek dem gat di jai fi deh mongs demde pipl weh waahn gi wan gif tu di Laad pipl dem dah Jerusalem.^a ⁵Ahn dehn du plenty muo an dat! Fos, dehn gi dehnselv tu di Laad, den tu wii —jos laik weh di Laad wehn waahn dem fi du. ⁶So, wi wehn inkorij Titus —weh wehn help unu staat

^a 8.4 cf. Acts 24.17.

dis speshal work a kainis— fi go, go aan ahn help unu fi finish'ih op. 7Ahn Ah nuo seh unu du evryting muo stranga an enybady els: Unu gat stranga fiet; unu kyan ekspres unuself beta; ahn unu nuo muo tingz tu. Unu kudn wiet fi gi unu gif, ahn unu nuo how fi lov iina wan beta wie. So den, Ah shuor seh unu gwain bii muo beta iina di wie how wi shuda gi.

8Main, Ah no deh gi unu dis wod laik wan komaan; bot Ah jos waahntes unu out fi si if unu lov dah laik fi di ada bredrin dem. 9Bikaaz, unu nuo how fi wi Laad Jesus Christ wehn so kain tu wi iivn duo him wehn so rich; bot sieka ihn lov fi unu, ihn mek ihnself get puor so dat chruu fi him puonis, unu kuda bii rich.

10So den, Ah wuda advaiz unu fi finish weh unu staat. Laas yier unu dah wehn di fos chorch fi staat gi. No ongl dat, bot unu dah wehn di fos wan dem weh iivn wehn waahn gi! 11So, siem wie how unu wehn so iiga fi staat dis kalekshan, unu fi waahn finish'ih now. Unu fi gi weh unu kyan, akaadn tu weh unu gat. 12Ahn ih no mata ho moch unu gat, az lang az unu wilin fi gi. Memba, God ongl waahn unu gi weh unu gat, no weh unu no gat.

13-14Az fi mii, Ah no deh trai fi put presha pahn unu, ahn mek'ih muo iiziya fi som neks wan. Bot ih ongl fier fi mek unu shier wid demde pipl weh gat so likl bit now. Den, wan neks taim dehn kyan shier wid unu, wen unu niid ih. Iina dah wie deh, evrybady gwain get weh dehn niid wen dehn niid ih. 15Laik weh rait iina di Skriptyo seh, “Di wan weh gyada plenty, neva gat notn lef; ahn di wan weh gyada likl bit, gat nof!”

Titus gaan dah Corinth

16Bot Ah tank God seh ihn mek Titus wilin fi help unu jos laik how wii wilin fi help unu. 17Wen wi aks Titus fi go tu unu, ihn wehn iiga fi go iivn chruu ihn uon frii wil. 18Ahn wi deh sen wan nada breda lang wid Titus. Evrybady rispek him iina aal di chorch dem, az sombady weh laik priich di Gud Nyuuz. 19Ahn no ongl dat, di chorch dem pik im fi go lang wid wi, wen wi ker dis aafrin tu di biliiva dem dah Jerusalem. Dis dah wan gif weh gwain bring gluory tu God, ahn ih gwain shuo ho moch wi waahn help.

20Unu fi nuotis seh, wi deh mek shuor seh nonbady gwain kyaahn kritisaiz wi fi how wi deh ker dis big gif yah tu dem. 21Wi trai wi bes fi du weh rait iina God sait, ahn iina di sait a di pipl dem tu.

22Ahn so, bredrin, wi deh sen wan nada wan a wi breda dem fi go lang wid di two a dem. Dis man pruuv tu wi uova ahn uova seh wi kyan chros im, ahn wi fain seh him muo wilin ahn iiga fi help now dat him gat plenty kanfidens iina unu tu. 23Now, az fi Titus, him dah mi paadna weh work lang wid mi fi help unu. Ahn, az fi di ada breda dem, dehn dah di wan dem weh di chorch dem sen, ahn dehn bring gluory tu Christ. 24So

den, shuo iich wan a dem unu lov fi pruuw tu di ada chorch pipl dem seh wi gat aal di raitis fi buos bout unu.

Help wi fela biliiva dem iina niid

9 ¹Now, Ah no hafy rait tu unu bout di gif dem weh unu gwain sen fi help God pipl dem dah Jerusalem,^b ²bikaaz Ah nuo seh unu wilin fi help. Ahn Ah wende buos tu wi fren dem dah Macedonia bout how unu biliiva fahn Achaia lan wehn redy fahn laas yier fi sen wan gif fi dem. Di chruut dah seh, sieka weh unu so wilin fi gi, dat staat op plenty a dem fi waahn gi tu. ³Ahn now, Ah deh sen demya bredda dem jos fi mek shuur seh unu redy fi chruut, laik weh Ah wehn tel dem. Ah no waahn ih end'op laik Ah wende buos bout unu fi notn! ⁴If di pipl dem fahn Macedonia wuda kom lang wid mi ahn fain out seh unu no redy wid unu gif, Ah gwain fiil shiem —ahn no ongl mii, bot unu tu afta aal weh Ah wehn tel dem. ⁵Ahn dat dah wai Ah wehn aks Titus ahn di res fi go ahed ahn mek shuur seh di gif weh unu wehn pramis, wehn don redy. Ahn Ah waahn unu gi dis gif bikaaz unu waahn gi'ih, ahn no bikaaz enybady fuos unu fi du'ih.

⁶Memba dis seyin: Wan faama weh ongl plaant wan likl bit a siid, ongl gwain riip wan likl krap. Bot di faama weh plaant plenty siid, ihn gwain riip wan huol pail! ⁷So den, evrybady fi mek'op dehn uon main az tu ho moch dehn gwain gi. Ahn dehn no fi tink haad fi gi, nar fiil laik enybady deh presha dem fi gi, bikaaz God lov di wan weh hapy fi gi! ⁸Ahn him kyan bles unu wid plenty muo an weh unu niid, so unu aalwiesz gwain gat nof fi unusef, ahn plenty muo fi shier wid ada pipl tu! ⁹Laik weh rait iina di Skriptyo seh:

“God pipl dem gi tu di puor wid wan frii han,
Di gud weh dehn du gwain laas fareva.”

¹⁰So, God, weh gi di faama siid fi plaant, gi'im bred fi iit tu! Siem wie, di Laad gwain gi unu plenty chaans fi du gud, ahn ihn gwain mek weh unu gi kom bak tu unu uova ahn uova agen! ¹¹God gwain bles unu nof so unu gwain kyan aalwiesz gat fi gi tu ada pipl. Den, demde pipl weh unu deh gi tingz tu, dehn haat gwain ful'op wid tanks tu God; ¹²bikaaz dis givn weh unu deh du laik wan sorvis tu God pipl dem dah Jerusalem, no ongl gwain mek dehn get weh dehn niid, bot ih gwain mek plenty tanks go'op tu God tu! ¹³Memba: unu gwain deh bring gluory ahn priez tu God sieka dah gif weh unu gi. Ahn dat pruuw seh unu deh obie di Gud Nyuuz a Jesus Christ. ¹⁴Ahn plenty pipl gwain prie fi unu wid plenty lov aal di taim iina dehn haat, sieka di wandaful gries weh God gi dem chruu unu. ¹⁵So den, mek wi tank fi wi Faada God fi di uova speshal gif weh ihn wehn sen fi wi. Wi kyaahn iivn fain di wod dem fi tel im tanks nof!

^b 9.1 cf. Acts 24.17.

Paul difen di speshal work weh ihn deh du

10 ¹⁻²Now, Ah hier seh, som pipl mongs unu seh Ai wiik wen Ah dedeh wid unu, ahn strang ongl wen Ah deh faar fahn unu! Bot Ai, Paul, deh beg unu iina di niem a Christ weh kain ahn omb! Unu no fi push mi fi get rof wid eny a unu wen Ah kom ahn si unu fies tu fies. Bikaaz, Ah shuor seh Ah kyan taak haad tu demde pipl deh, weh deh seh mii ahn mi fren dem ongl go aan laik aadinary pipl iina disya worl ahn notn muo an dat! ³Dah chruut, wi deh liv iina dis worl, bot wi no fait laik how di pipl dem iina dis worl fait wen dehn go dah waar. ⁴Di kain a wepan dem weh wi deh fait wid, dah no di kain weh di pipl a disya worl yuuz. Insida dat, wi yuuz di wepan weh dah di powa a God weh kyan distrai di strang plies dem a di enemy! ⁵Wi deh yuuz demya wepan deh, fi kom gens eny proud aagyoment weh wuda stap di pipl dem fahn nuo God! Ahn wi tek kanchruol a evry aidiya ahn evry kain a tinkin, ahn mek dehn kom fi obie Christ! ⁶So den, wen wi si seh unu deh obie Christ iina aal weh unu du, dat dah wen wi gwain ponish enybady weh stil yet no deh obie im.

⁷Unu si, unu ongl deh joj bai how di tingz dem luk pahndi outsaid. So, if eny a unu aredy nuo fi shuor seh him dah fi Christ, den dah man hafy nuo seh wi dah fi im tu! ⁸Now, ih maita luk laik Ah deh buos likl bit tuu moch bout di atarity weh di Laad wehn gi mi. Wel, Ah no shiem fi buos bout'ih, bikaaz dah atarity dah fi bil'op unu fiet; no fi bring unu dong. ⁹So, bredrin, Ah no deh trai fraitrn unu wid mi leta dem! ¹⁰Bot som pipl seh, "Paul strik ahn strang iina ihn leta dem, bot wen ihn deh wid wi iina porsn, ihn wiik ahn ihn wod dem no miin notn ataal." ¹¹Wel, Ah waahn demde kain a pipl weh tink laik dat, andastan dis: Weh wi seh iina wi leta dem, wen wi no dedeh wid unu, dah di siem ting dem weh wi gwain seh fronta unu!

¹²Af kuors wi no gwain deh kompier wiself wid demde pipl weh tink so moch a demself! Demde kain a pipl dah fuul! Dehn no gat non sens ataal, bikaaz aal dehn deh du dah kompier demself wid wan anada. ¹³Bot az faar az wii kansaan, wi gwain ongl buos bout di work weh God set fi wi du, ahn ongl az faar az di limit weh di Laad set fi wi, ahn dat inklud unu. ¹⁴Ahn wi neva wende paas dat limit, wen wi gaan upaa unu deh fi tel unu di Gud Nyuuz bout Jesus Christ. ¹⁵Ahn wi no deh tek non priez fi di work weh ada pipl dem du niida, laik dah wii wende du'ih. Insida dat, wi deh huop seh unu fiet gwain gruo, ahn dat wi work mongs unu gwain gruo muo stranga tu, bot ongl az faar az di limit weh God wehn set fi wi. ¹⁶Den, wi gwain kyan go, go priich di Gud Nyuuz iina ada kontry weh deh faar paas weh unu deh, weh nonbady els no deh du non work yet. Den, wi no gwain hafy buos bout di work weh sombady els deh du iina fi dehn uon ieriya.

¹⁷Dah laik weh di Skriptyo seh, “If sombody fi buos, mek dehn buos bout di gud work weh di Laad du.” ¹⁸Bikaaz, wen di pipi dem buos bout demself, ih no miin notn ataal. Bot, wen di Laad taak gud bout dem, dat dah weh kount fi chruut, bredrin!

Paul taak bout di faals apasl dem

11 ¹Now, Ah huop seh unu wuda kantinyo fi gat pieshens wid mi wan likl wail langa, az Ah go hed taak laik wan fuul: ²Fos, Ah fiil jalas fi unu, siem laik how God ihnsel wuda fiil jalas uova unu, bikaaz Ah wehn pramis fi gi unu tu wan hozban —weh dah Christ— az wan huoly, vorjin braid. ³Bot, Ah fried seh sombody gwain liid unu astrie fahn di chruu lov weh unu gat fi Christ, siem laik how di sniek wehn trik Eve! ⁴Bikaaz, ih luk laik unu redy fi biliiv enybady weh priich bout wan nada Jesus, difrent fram di wan weh wi wehn priich tu unu! Ahn unu redy fi get wan nada spirit tu, ahn unu iivn redy fi aksep wan difrent Gud Nyuuz fahn di wan weh unu wehn aksep fahn wi!

⁵Now, Ah no tink seh eny a dehn suo-kaal “big taim apasl” muo beta an mii. ⁶Ah maita kyaahn taak az gud az demde man, bot Ah nuo az moch az dem —ahn muo so! Mii ahn mi fren dem shuo dis tu unu iina evrywie ahn plenty taim tu.

⁷Far instans: wen Ah wende priich di Gud Nyuuz tu unu, Ah wehn priich'ih bitout non pie ataal. Ah wehn ombl miself jos fi Ah kuda wehn lif unu op! Unu tink seh dah wehn wan mistiek? ⁸Ahn wen Ai wende work mongs unu, Ah yuuz di mony weh di ada chorch dehn sen fi mi. So den, unu tink seh Ai wende tiif dem fi help unu? ⁹Nuo sah! Wen Ah wende wid unu, Ah neva gat nof fi liv aafa, ahn Ah neva aks nonbady fi notn niida, bikaaz mi fren dem dah Macedonia wehn gi mi evryting weh Ah wehn niid. Ah neva yet aks unu fi enyting ahn Ah gwain neva aks unu niida! ¹⁰Ahn az shuur az di chruut a Christ deh iina mi, Ah no gwain stap buos bout dat aal uova Achaia lan. ¹¹Ahn wai Ai deh seh dat? Bikaaz Ah no lov unu? No man, God nuo seh Ah lov unu fi chruut!

¹²Bot Ah gwain ahed ahn du weh Ah deh du, so dehn suo-kaal apasl gwain kyaahn buos seh dehn deh du di siem work laik weh wii deh du. ¹³Pipl laik demde man weh laik buos —dehn dah faals apasl weh deh fuul unu op ahn deh shuo aaf demself laik dehn dah Christ chruu apasl, bot dem dah no so!

¹⁴Wel, no wanda, bikaaz iivn Satan kyan mek himself luk laik wan ienjel ah lait! ¹⁵So, dah no wan big ting if fi him sorvant dem wuda du di siem ting ahn priten seh dehn dah God sorvant dem, weh deh du weh rait. Bot, pahndi en, demde kain a pipi gwain get egzakly weh dehn dizorv fi weh dehn du!

Bikaaz ihn dah wehn wan apasl, Paul sofa plenty ting

¹⁶Ah deh seh dis agen: No mek nonbady tink seh Ai dah wan fuul wen Ah taak laik dis. Bot, if dat dah weh unu tink bout mi, den mek Ah bii

wan fuul ahn buos wan likl bit langa. ¹⁷Dah chruut, Ah deh buos laik wan fuul, bot dat dah no how di Laad waahn Ah fi taak. ¹⁸Bot, if plenty ada pipl kyan buos bout weh dehn du iina fi dehn uon strent, den Ai kyan buos tu. ¹⁹Ahn sins unu so waiz, unu muo an wilin fi put'op wid eny porsn weh fuul! ²⁰Yees, unu put'op wid it wen demde kain a pipl tek unu, mek sliev or chaans wid unu, or tiif unu op, or go aan laik dehn muo beta an unu, or iivn slap unu iina unu fies! ²¹Ahn Ah shiem fi seh, wi neva strang nof fi du demya tingz deh!

Bot, wateva enybady deh buos bout —ahn Ah deh taak laik wan fuul agen— Ah fiesty nof fi buos bout dat tu: ²²Eny a demde suo-kaal apasl dah Hebrew? Ai dah dat tu. Eny a dem dah Israelite? Mii tu. Dehn dah fahn Abraham famaly lain? Mii tu! ²³Eny a dem dah Christ sorvant? Ah nuo seh Ah deh taak laik wan mad man, bot Ai sorv Christ iivn muo beta an dem. Di chruut dah seh, Ai work haada an aala dem. Ah get chruo iina jiel plenty muo an eny a dem. Ah get wip plenty muo taim an Ah kyan kount, ahn Ah wende dah det duo muo an aala dem. ²⁴Five taim di Jew dem sentens mi tu thirty-nine lash. ²⁵Three taim di Roman dehn biit mi wid stik. Wan taim mi enemy dehn lik mi dong wid rak. Ah wende iina ship-rek three taim, ahn Ah wende jrif pahn sii fi wan huol nait ahn wan die. ²⁶Ah wehn aalwiesz deh travl, ahn so Ah wehn iina dienja fahn plenty riva tu. Ah wehn iina dienja fahn tiif, fahn mi uon pipl dem, ahn fahn demde pipl weh dah no Jew tu. Ah wehn iina dienja iina di sity, lang di kontry-said, ahn pahn di sii. Ahn Ah wehn iina dienja iivn fahn faals bredrin. ²⁷Ah work uova haad chruu plenty haad taim. Ahn plenty nait Ah no sliip ataal; plenty taim Ah dedeh hongry ahn torsty; som taim Ah no gat non kain a fuud, ahn Ah dedeh kuol ahn niekit.

²⁸Den pan tapa dat, evry die Ah deh aanda presha deh worry bout aal di chorch dem. ²⁹Dah huu wiik, ahn Ai no fiil dehn wiiknis? Dah huu dem weh get liid astrie, ahn Ah no fiil uova bad fi sieka weh hapm tu dem? Ah fiil sad fi aala dem!

³⁰So den, bredrin, if Ah hafy buos, den mek Ah buos bout aal di tingz weh shuo mi wiiknis. ³¹Bot, bles di God ahn Faada a di Laad Jesus fareva, bikaaz him nuo seh, Ai no deh tel lai! ³²Wen Ah wende dah Damascus, di govana weh wende aanda King Aretas wehn gat di sity aanda gyaad fi si if dehn kuda wehn grab mi. ³³Bot mi fren dem hais mi dong iina wan baaskit chruu wan winda iina di waal, ahn dah so Ah get-weh fahn im!

Di Apasl Paul get ker'op dah Paradais

12 ¹Bredrin, Ah hafy buos, iivn duo ih no gwain du nonbady non gud. Bot, Ah gwain buos enyhow bout di vizhan ahn di siikrit tingz weh di Laad wehn shuo mi: ²Ih hapm seh bout fourteen yierz abak

Ah wehn nuu dis biliiva weh wehn get ker'op dah di haiyis hevn weh paat God liv. Ah no nuu if dis man wehn iina ihn bady, or if dah ongl ihn spirit weh gaan op; ongl God nuu dat. ³⁻⁴Ai gwain seh ih agen: Ah no nuu if dis man wehn iina ihn bady, or if dah ongl ihn spirit weh gaan op; ongl God nuu. Wel, him wehn get ker'op dah Paradais, ahn op dehso ihn hier tingz weh no wodz deh, az tu how fi seh dem. Dehn wehn gat tingz weh non hyuuman mout no gat pormishan fi seh. ⁵Now, Ah gwain buos bout datde man, bot Ah no gwain buos bout miself. Ah ongl gwain buos bout di tingz dem weh shuo how wiik Ah wiik. ⁶Bot, iivn if Ah wehn waahn buos, Ah neva wehn gwain bii wan fuul, bikaaz Ah wuda deh tel di chruut! So, Ah no gwain buos, bikaaz Ah no waahn non a unu tink eny haiya a mi an weh unu shuda tink, sieka aal di tingz weh unu si mi du or hier mi seh.

⁷Bot, fi kiip mi fahn get swel-hed aafa di paila wandaful tingz weh Ah wehn si, Ah wehn get somting laik wan big prikl iina mi bady. Dah wehn laik wan a Satan ienjel dem imself, weh wehn sen ih fi taament mi ahn kiip mi ombl. ⁸Ah prie bout dat ahn beg di Laad three taim fi him tek'ih weh fahn mi. ⁹Bot di Laad ansa mi seh, "Mai gries dah aal weh yu niid, bikaaz mai powa work di bes, wen yu wiik." So den, bredrin, Ah ongl glad fi buos bout aal di tingz weh mek Ah wiik, so dat Ah kyan fiil Christ powa work chruu mii! ¹⁰Dah sieka Christ, Ah happy wen Ah wiik, or wen dehn insult mi, or wen Ah go chruu haad taim or eny kain a sofarin, or wen dehn triit mi bad —bikaaz, wen Ah wiik, dah dah taim, Ah strang!

Paul kansaan bout di biliiva dem

¹¹Ay bwai, Ah deh go aan laik wan fuul, bot dah sieka unu! Dah unu weh shuda wende seh gud tingz bout mii, bikaaz dehn suo-kaal "big taim apasl" no beta an mi —non a dem, iivn if Ai dah no notn! ¹²Memba, wen Ah wende wid unu, Ah wehn pieshent wid unu ahn Ah du aal kain a sain, wandaz ahn mirakl fi pruuw seh Ai dah wan chruu apasl. ¹³Ahn di ongl wie Ah wehn triit unu eny wosa an eny a di ada chorch pipl dem, dah seh Ah neva bada unu fi non mony. Fargiv mi fi du unu demde bad tingz!

¹⁴Now, dis dah di third taim Ah redy fi go luk fi unu. Ahn dah unu Ah waahn, no unu mony. Aftaraal dah no di pikniny dem fi siev'op fi gi dehn muma ahn dehn pupa weh dehn niid. Inside dat, dah di muma ahn pupa dem fi siev'op fi gi dehn pikniny dem. ¹⁵Ahn Ah ongl gwain get happy fi gi unu aal weh Ah gat —ahn iivn gi unu miself tu, fi help unu! So den, dat miin unu gwain lov mi eny les jos bikaaz Ai lov unu tuu moch?

¹⁶So, unu gwain grii wid mi seh Ah wehn neva bada unu nontaim, no chruut? Bot den, somebody gwain seh Ah wende smaat unu out, laik how Ai so triky. ¹⁷Bot how? Ai wehn eva tek advantij a unu wen Ah wehn sen demde mesinja tu unu? Nuu sah! ¹⁸Bot Ah wehn inkorij Titus fi go, go luk

fi unu, ahn Ah sen wan a di ada bredda lang wid im tu. Ahn Titus neva tek advantij a unu niida, rait? Dat dah so, bikaaz mii ahn him gat di siem kain a main, ahn wi du tingz di siem wie.

¹⁹Mieby unu tink seh wi deh seh demya tingz jos fi difen wiself. Bot, dah no dat niida! Mii ahn Titus deh taak tu unu iina God sait jos laik how Christ sorvant dem wuda taak. So unu, weh dah mi gud fren dem, biliiv wii wen wi seh evryting weh wi deh du dah fi bil unu op! ²⁰Bot Ah fried seh, wen Ah go si unu, Ah no gwain laik how Ah fain unu ahn unu no gwain laik how Ai hangl di sityuwieshan dem niida. Bikaaz, Ah fried seh Ah gwain fain plenty kwaaril, ahn jalasy, ahn tempa deh flai, selfishnis, ahn slanda, gasip, ahn praid —ahn som pipl deh go aan uova bizy-bady tu. ²¹Yees, Ah fried seh di neks taim wen Ah go tu unu, mai God gwain mek Ah fiil shiem fronta unu; ahn Ah gwain baal fi plenty a unu weh wende liv iina sin, ahn weh no waahn stap sliip roun, ahn weh deh liv slak laif, ahn weh deh los ahn aal dem ada kain a bad livin.

Paul laas waanin ahn griitin dem

13 ¹Dis dah di third taim Ah deh go luk fi unu. Ahn, laik wi riid iina di Skriptyo, wan porsn hafy gat at liis two wiknis fi pruuw eny chaaj weh ihn bring gens enybady fi dehn get ponish. ²Wel, wen Ah wende wid unu pahn mi sekant vizit, Ah waan demde pipl weh wende sin. So now, wail Ah no dedeh wid unu yet, Ah deh waan demde pipl agen, so wen Ah go tu unu, non a dem no gwain eskiep ponishment fi dehn sin! ³Ahn if som a unu waahn pruuw seh Christ deh taak chruu mi fi chruut; wel, Christ gwain shuo unu. Memba, di Laad no wiik ataal wen ihn diil wid unu, bot ihn dah wan maity powa mongs unu. ⁴Ahn memba tu seh: alduo Jesus wehn ded pahn di kraas iina wiiknis, him deh liv now bai di maity powa a God! Siem laik so, iina Christ wi wiik tu —siem laik how him wehn wiik— bot now wi gwain liv bai God powa jos laik how Jesus du wen wi go diil wid unu!

⁵So den, unu fi chek unu haat gud ahn si if unu deh liv iina fiet fi chruut. Tes out unuself ahn si if Christ Jesus riily deh liv iina unu. If unu no deh liv iina fiet, den unu fiel di tes! ⁶Ahn az fi wii, wi huop seh unu gwain get fi nuo seh wi neva fiel dah tes.

⁷Now, Ah prie tu God seh unu no gwain du notn weh rang. Ahn Ah prie laik so, no bikaaz wi waahn evrybody si seh wi deh tiich unu uova gud, bot dah bikaaz wi riily waahn unu fi du weh rait, iivn duo mongs ada pipl ih maita luk laik wi deh fiel iina wi work. ⁸Bredrin, wi waahn unu fi nuo seh wi kyaahn du notn fi fait gens di chruut; wi kyan ongl fait far ih! ⁹So, wi hapy wen wi wiik, bot unu strang. Ahn wi prie seh God gwain mek unu gruo evry die tu di fulis! ¹⁰Ahn dat dah wai Ai deh rait demya tingz tu unu now, bifuor Ah get deh. Ahn Ah deh du'ih, so dat wen

Ah kom, Ah no gwain hafy bii so haad pahñ unu wen Ah yuuz di atarity weh di Laad wehn gi mi. Ahn dat atarity gwain bii fi bil unu op, no fi tier unu dong!

¹¹Fi di laas paat a mi leta, bredrin, Ah waahn tel unu gudbai! Lisn tu weh Ah deh beg unu: Unu fi trai fi gruo evry die iina di Laad tu di fulis! Ahn unu fi trai get lang wid wan anada tu ahn liv iina piis wid evrybody. Ahn den, di God a lov ahn piis gwain deh wid unu aalwiez!

¹²Hiel'op wan anada wid wan huoly kis.

¹³Aala God pipl dem seh fi tel unu heluo.

¹⁴Mek di gries a di Laad Jesus Christ ahn di lov a God deh wid unu, ahn mek di Holy Spirit jain aala unu haat tageda. Amen!